

Nr 250/16

(A2007553)

Z c
98

Eine Christliche Predigt/
Über der Leich

des Ehrwürdigen Herrn
M. NICOLAI Zagenteuffels/

Pfarrherrn zu Weymar in Thüringen/ des Für-
stenthumbs Sachsen Weymarischen theils / General Su-
perintendenten / vnd des Consistorij daselbsten Assessorn/
so den 25 Martij / das ist / am tage Annunciationis Mariae
dieses 1583 Jahrs / zu Weymar / in Gott seliglich ent-
schlaffen / vnd selgends den 27 Martij / in S. Ja-
cobs Kirchen / Christlich zur Erden
bestatet worden.

Gehalten in der Pfarrkirchen

durch

M. Martinum Langium

Diener des Göttlichen Worts
daselbsten.

Mit folgenden Epicedijs

Wittenberg.

Gedruckt durch Simon Grönenberg.

1 5 8 4.



[Faint, illegible text, likely bleed-through from the reverse side of the page]



Der Erbare vnd

Zugentsamen Frawen Walpurg / des
Ehrwürdigen / Aeltbarn vnd Hochgelarten Herrn /
Magistri Nicolai Jagenteufels, weiland Pfarherrn
vnd General Superintendenten zu Weymar / seli-
gen / nachgelassenen Wittwen / meiner gün-
stigen vnd besonder guten
Freundin

Gottes Gnad vnd Barmherzigkeit / durch vnsern
getrewen Herrn vnd Heiland Jesum Christum / mit reichem
trost vnd stercke im heiligen Geiste / sampt erbietung mei-
nes gleubigen Gebets / vnd ganzwilliger Christ-
licher dienste / jeder zeit zuuor.

Gerbare / Zugentsame Fraw Su-
perintendentin, auch geliebte Freundin /
Gott der heilige Geist im 4. Cap. des
Buchs der Weisheit sagt mit gar schö-
nen ernstten Worten : Der Gerechte / ob
er gleich zu zeitlich stirbet / ist er doch in
der ruhe etc. Denn er gefelt Gott wol / vnd ist im lieb / vnd
wird weggenommen aus dem Leben vnter den Sündern /
vnd wird hingerückt / das die Bosheit seinen verstand nicht
verkeret / noch falsche Lere seine Seele betriege. Den die bösen
Exempel verführen vnd verderben ein das gute / vnd die rei-
sende lust verkeret vnschuldige Herzen. Er ist bald volkomen
worden / vnd gar viel Jar erfüllet / denn seine Seele gefelt
A. ij. Gott

Vorrede.

Gott wol/darumb eilet er mit jm aus dem bösen Leben. Aber die Leute so es sehen / achtens nicht / vnd nemens nicht zu herzen / Nemblich das die heiligen Gottes/in gnade vnd Barmherzigkeit sind / vnd das er ein auffsehen auff seine Aufferwelten hat.

Diese wort lassen sich ansehen/als redten sie allein von dem vrploßlichen / vnzeitigem Abschied junger vnuerlebter Leute / welche in der besten Blüet ihres Alters mit Tode abgehen/Aber so genau vnd enge sollen wir sie nicht spannen noch einziehen / sondern wissen/das sie handeln in gemein von aller Christen/sie sind jung oder alt/sonderlich aber vnd fürnemlich / von trewer / reiner / bestendiger / ernsthafter Lehrer vnd Prediger seligem tödtlichem Abgang/vnd führen vns etliche wichtige vrsachen zu gemüt / vmb welcher willen sich derselbige/nach Gottes heiligem Rath vnd Väterlichem willen/offtermals begeben vñ zutrage. Klagen auch darob/das der größte vnd meiste hauff der Welt/so im argen ligt/dieselben vrsachen/dem gewöhnlichen brauch vnd lauff nach/verechtlichen in Wind schlegt/vnd es dafür achtet / es geschehe aus blindem glück / oder ohn alles gefehr / das durch den zeitlichen Tod/eilends vnd vnuersehens/viel fromer/heiliger/glaubiger Christen/trewer Menner vnd Diener Gottes / aus diesen elenden betrübtten zeiten vnd Jammerthal hingerafft werden. Also ist kein zweiffel / es werden irer viel auch der meinung sein/als ob sich ewers lieben Herrn(Christlicher gedechtnis) Seliger abschied aus dieser Welt/vngefehr begeben / vnd nichts besonders drawe. Aber damit ir sehen vnd spüren müget / das ich für meine einfalt/vnd zweiffels ohne/mit mir auch viel andere frome Herren/ist gedachten ewers vielgeliebten Herrn/sehr vrploßlichen vnd ganz vnuersehenen Todesfal/für ein sonderlich Zornzeichen Gottes achte vnd
halte &

Vorrede.

Halte/welches der Gerechte vnd trewe Gott/vns für Augen
gestelt /vns darmit anzuzeigen vnd zuerinnern/ das er etwas
sonderliches vnd grosses abermals mit vnser armen Kirchen
fürhabe: Als ist von mir nötig vnd nützlich angesehen worden/
dessen zum öffentlichen zeugnis / euch eine Copiam oder Ab-
schrift der kurtzen vnd einfeltigen Predigt / so bey der Christ-
lichen vnd herrlichen Begrebnis/berürten ewers lieben Hers-
ren seligen / von mir/ in grosser eil/mit betrübtem gemüt ge-
halten/ zuzustellen.

Besonders / weil dieselbige/auch von gutherzigen Chri-
sten/von mir begeret vnd abgefodert worden. Vnd ob mir
wol mein vnuermügen bewust / auch mich nichts weniger
zubescheidē habe/den das kein sonderlicher ornat oder schmuck/
viel weniger hochtrabende wort / noch zierliche reden drinnen
zu finden / wie die zarte Ohren gerne hören/Vnd demnach
leicht erachten kan/das so sie würde auskomen/ auch allerley
vngleiche Iudicia vnd Urteil drüber gefallen werden/Jedoch
habe ich zusörderst Gotte zu ehren / gedachter fromer herren
bitt vnd begeren bey mir raum vnd stat wollen finden lassen.


Vergebe euch also hiermit gethane Leichpredigt / so
gut sie der Allmechtige Gott/dazumal in vnsern gemeinen
betrübnis/gegeben vnd dargereicht / freundlich bittende / ih-
sampt ewern hergliebē Erben vnd Kindern/wollet diesen mei-
nen Christlichen dienst vnd wilfarung freundlich vnd zum bes-
sten vermercken vnd auffnehmen. Datum Weymar den 21.
Aprilis/im Jar nach Christi vnseres Seligmachers Ge-
burt 1583.

E. E.

W.

Magister Martinus Langius, Diener
des Göttlichen Worts daselbsten.

M. MARTINO LANGIO,
SVO IN CHRISTO FRA
tri, M. Andreas Iagenteuffel
S. P.

 Enerande Vir: Mater nostra, & nos liberi supersti-
tes, tuam hanc, in charissimum nostrum parentem
defunctū, pietatem, & officiū, beatissimæ ipsius *evā-*
varicæ monumentum, inter nos, & in familia nostra,
perpetuum esse volumus. Et visum est omninò in publi-
cum edere. Sed non, nisi de consilio & consensu virorum,
(quod maximè cupiebas) eruditorū, & sinceræ veritati Euā-
gelicæ addictissimorum: qui, vt deprehendes, quædam etiam
monuerunt. Ea verò quæ de historia tuum requisierat insti-
tutū: at vos in luctu & temporis angustia, exactè inquirere
non potuisse prætendebas; nos inuestigata substituimus.
Adeoque quod magnoperè ampliùs in hac editione desiderent
boni, haud faciliè inuenturos esse, nobiscum confide, & vale.



Die Predigt.

Bermanung zum gemeinen Gebet.

S Eliebte im HErrn / auff das wir in diesem
vnsrem gemeinen betrübnis / so vns nach
Gottes willen vnd wolgefallen zustehet / et-
was nützlichs aus Gottes wort mügen anhdren/
handeln/lernen /vnd behalten/das es gereiche Gott
dem Allmechtigen zu lob vnd preis / zu sterckung
vnsers schwachen Glaubens / zu trost vnserer blo-
den Gewissen / zu besserung vnsers sündlichen Le-
bens / vnd endlich zu vnsrer aller Seelen Heil vnd
Seligkeit/wollen wir In/ im Namen seines lieben
Sons vnsers HErrn Jesu Christi/vmb die gnade
vnd beystand des heiligen Geists anruffen/vnd in
warem Glauben mit einander beten ein andechti-
ges Vater vnsrer / etc.

Ablefung des Texts.

Ewer Lieb wollen anhdren ein gar kurzes
Sprüchlein vnsers HErrn vnd Heilandes Jesu
Christi / aus dem 8. Cap. des heiligen Euangeli-
sten Johannis/ welches also lautet:

Warlich / warlich / ich sage euch / so
jemand mein Wort wird halten / der wird
den Tod nicht sehen ewiglich.

Ausles

Leichpredigt.
Auslegung.

S werden sich / geliebte Christen
sonder zweiffel / etliche / in dieser herrlich-
en / grossen / vnd gantz Christlichen ver-
samlung / darob sehr verwundern / war-
umb ich / als ein junger vngelübter Man / diesem
fürtrefflichen / hochbegabten / Alten / Gelehrten /
gelübten vnd woluerdientem Manne / dem Ehrwür-
digen / Aichtbarn vnd Hochgelarten Herrn M. Ni-
colao Tagenteuffel / vnserm geliebten Herrn Super-
intendenten vnd Pfarherrn / auch getrewen mit-
bruder in Christo / der nu mehr in Gott seliglichen
entschlaffen / vnd hieher für vnser Augen getra-
gen / seine Leichpredigt zu thun / vnd jme sein zeug-
nis ley der Christlichen Kirchen zu hinterlegen /
Auch die / so ober diesem seinem vnuersehenem Ab-
schied höchlichen betrübet / zu trösten vnd auffzu-
richten / mich vnterwunden / Dieselbigen sollen
wissen / das es nicht geschehe aus obermut / oder
einigem fürwitz / Sondern auff entpfangenen be-
fehl / vnd nach erheischung schuldiger pflicht / Chri-
stlicher trewe / vnd gebürlicher danckbarkeit / so ich /
nicht weniger als jemand anders / diesem Gottseli-
gen / woluerdientem Manne zu leisten schuldig bin.
Vnd vmb solcher erregten Ursachen willen /
bitte ich freundlich / frome Christen wolten mit mir /
da

Leichpredigt.

Da ich für wehmut / solch auff mich genommenes
Werck nicht gnugsam / wie wol billich vnd nötig
were / verrichten möchte / freundliche vnd Christ-
liche gedult tragen.

Ueßerer / die irem brauch nach / alles / vbel
vnd anders / denn es geredt vnd gemeint ist / deuten
vnd auslegen / mögen hinfaren / Ir Lohn wird inen
zu seiner zeit auch wol werden.

Ich habe aber dieses verlesene Sprächlein /
aus der vrsachen / vnser Lectio wollen sein lassen /
Weil es in der Warheit nicht allein ein recht Con-
fortatium, vñ herzksterckung ist / durch welchs wir
alle sorgliche / schwermütige gedanken / so vns ob
der vnsern / vnd vnser trewer Lehrer vnd Seelsor-
ger tödlichem abgang einfallen / vnd vnser Hertz
bekümmern vnd betrüben mögen / gewaltig ver-
treiben vnd ausschlagen können / Sintemal der
ewige Son Gottes / vnser getrewer Herr vnd
Heiland Iesus Christus / sich selbst / als den eini-
gen rechten Seelenarkt / vnd sein Wort als ein ge-
wis Probiertes recept / oder krefftige Arzney / seine
gleubigen Christen / sie vom ewigen Tode zu befre-
en vnd zuentledigen / im zeitlichen aber also zu er-
halten / das sie denselben nicht sehen / noch etwas
entpfindlichs von ime schmecken oder fülen sollen /
fürstellet vnd darreicht : Sondern weil vns dessen
auch Gott ein lebendig Exempel / an diesem vnsern
B viele

Leichpredigt.

viel geliebten Herrn Superintendenten (seligen) bewiesen/ vnd dargestellet. Denn in Gott so sanfft ein-
schlafen lassen/ das wir mit warheit von ihm sagen/
vnd rühmen können / das er den Tod/ nach dem
wort Christi/ nicht gesehen/ vnd auch in ewig-
keit nicht sehen wird. Welchs ons denn nicht al-
lein tröstlich sein sol/ Sondern auch vrsach gebē/ zu
Christo vnd seinem Wort ons zu halten/ vnd solche
selige sterbfunst zu vberkommen/ mit gebürendem
Christlichen ernst ons beflüssigen. Solchs so viel
deste bas war zu nemen/ wollen wir in dieser Pre-
dige diese drey stück handeln:

Erstlich/ Den rechten verstand vnd nutz die-
ses Sprüchleins kurz vnd einfeltig erkleren.

Zum andern/ Wie Gott dieses Sprüchlein
vñ dis sein wort/ an diesem vnsern Superintendentē
vñ trewē Pfarherrn (seligen) bewiesen/ vñ ins werck
gerichtet/ darthun vnd anzeigen/ vnd im also/ wie
billich/ lehr vnd lebens halben/ sein Christlich
zeugnis geben vnd hinderlegen.

Zum dritten/ Mit wenig worten berühren/
was wir semplich vnd sonderlich/ bey dem tödlichen
abschied/ dieses vnser's geliebten mitbruders/ beden-
cken vnd betrachten sollen.

Der allmechtige getrewe Gott vnd Himlische
Vater/ nach welches gnediger Disposition/ willen/
vnd

und wolgefallen/ sich/ dieser vnuersehener und vhr-
plötzlicher todesfal begeben/ wolle vns nachmals
allerseits zu leren und lernen/ seine Gnad und hei-
ligen Geist/ mildiglich verleihen/ vmb des vnschül-
digen bitter leidens und sterbens Jesu Christi seines
geliebten Sons/ vnser getrewen HErrn und Hei-
lands willen/ Amen.

Das erste Stücke/

Die kurze und einfeltige erklerung des abge-
lesenen Sprüchleins belangend/ müssen wir
auff drey membra oder Theil/ gut acht haben. Den
Erstlich wil der ewige Son Gottes/ vnser getrewer
HErr und Heiland Christus/ vns erinnern vnser
allgemeinen zustandes/ in dem wir alle sampt/ von
natur stecken/ nemlich des TODES/ in den wir
durch die Sünd gerathen/ das ist/ er wil vns zu ge-
müt führen/ wie wir alle von wegen vnser Sünden
darin wir entpfangen und geboren werden/ so viel
an vns ist/ von G D E E/ seiner Gerechtigkeit/
Seligkeit und Ewigen leben/ zu dem wir an-
fänglich von G D E E erschaffen worden/ hie
zeitlich/ und darnach ewig/ müssen verstorben
sein und bleiben. Denn es ist G H R I S T U S in

Psalms. 51.

Leichpredigt.

diesem ganken Sprüchlein / einig vnd allein vmb
den TOD zu thun/das derselb von vns abgeschaffet
werde / vnd dahin vnd zu dem ende / ist auch alle
sein hülff vnd dienst gerichtet vnd gemeinet. Wer
mein wort wird halten / der wird / spricht er /
den TOD nicht sehen.

Vnd ob zwar wol die erfahrung gnugsam gibe
vnd leret / wie dieses zeitlich leben nicht ewig
bleibe / noch wehre / Sondern immer einer nach dem
andern hinsterben mus / so lessets doch Christus da-
bey nicht bleiben / sondern weist ferner / das es ime
zumal auch vmb den ewigen Tod zu thun sey / das
wir ewig den TOD nicht sehen / als der aller erst
der rechte Tod vnd verderben ist / wie vns Gott
in seinem Göttlichen Wort gnugsam offenbaren
vnd zuerkennen geben lest / wie auff den zeitlichen
Tod auch der ewige erfolge. Denn der Mensch
von wegen der Sünden / des todes sterben sol / wel-
ches vom ewigen tode geredt ist / zu welchem der zeit-
liche ein anfang sein sol.

Gen. 2.

Vnd dieses gehet vns Menschen alle in gemein
an / vnd dessen / vnd keines andern / haben wir vns al-
le von Natur / niemand / on Christum vnsern HEr-
ren allein ausgeschlossen / zuuersehen. Denn wir
allzumal gesündigt / vnd durch einen Menschen ist
die Sünde in die Welt komen / vnd der Tod durch
die

Rom. 9.
Rom. 5.

Leichpredigt.

Die Sünde / der ist zu allen Menschen durchdrun-
gen / die weil sie alle gesündigt haben / Ja weil alle
in Sünden empfangen vnd geboren werden. Vnd Psalms. 51
bleibt dabey / das allen Menschen gesetzt ist / ein Hebr. 9
mal zu sterben / vnd darnach das gericht.

Welchs je an im selbs nicht allein schrecklich ist /
darüber wir alle erzittern vnd erschrecken müssen /
oder ja solten / Sondern wir haben auch zum höch-
sten darüber billich zu klagen vnd zu trawren / wenn
wir zumal bedencen / wie gar ein vnüberwindli-
cher vnd vnableglicher jammer vnd schade / vns ar-
men Menschen / so viel an vns ist / der Tod sey. Wie
es ausführlicher künde dargethan werden / wenn
es die zeit vnd gelegenheit leiden möchte.

Das ist also eins / das vns Christus zubeden-
cken / hiemit fürstellen wil / nemlich der zeitliche vnd
ewige Tod / welchen wir von Natur / von wegen der
Sünden an vns haben vnd tragen / damit wir in
ja / sicherer blinder weis / nicht aus den augen setzen /
vnd verachten / sondern wol kennen vnd betrach-
ten lernen / vnd also ferner / sein / des H E R R N
Christi / als des Fürsten des lebens / desto trewlicher
Wahrnehmen mögen / vnd seiner erlösung vnd hülf
vns gebrauchen. Denn frechsichere / fleischli-
che verachtung / vnd vergessenheit / dieses vnser
elenden vnd erbermlichen zustandes / wil vnd kan
Gott vnd Christus an vns nicht leiden noch dul-

Leichpredige.

Mal. 51.

Den/ Denn sie zur seligkeit vñ erlösung nicht allein
nichts dienet/ Sondern viel mehr hindert vnd scha-
det/ ja nur erger in solch ewiges verderben/ vnd tod
verteuffet. Die Wahrheit / spricht David / liebt
Gott offenbar/ vnd/ die Spffer/die Gott gefallen/
sind ein geengster Geist/ Ein geengstis vnd zerschla-
genes Hertz wirstu Gott nicht verachten.

Zum andern aber / stellet sich vnser getreuer
H E R R vnd Heiland Jesus Christus/ in diesem
sprüchlein/ selbst dar/ wider den Tod/ als den einigen
rechtē/ bewertē Arzt/ der einig vñ allein vns Men-
schen von solchen vnsern schweren vñ vnableglichen
schadē vnd vnglück/ so genzlich vñ volkemen/ wie es
die not erfodert/ befreiē vñ erlösen könne/ das wir den
Tod nimmermehr auch nicht sehē sollen/ Den so lau-
ten seine wort: Wer mein wort wird halten/
der sol den Tod nicht sehen ewiglich/ vnd sol-
ches vormittels seines heiligē worts/ welches er vns/
als das probirte Recept/ vñ gewisse Arzney/ wider
diesen schadē zeigt vñ darbeit. Denn dis sein wort/
als das ewige vnwandelbare wort vnd krafft Got-
tes/ darein er all sein verdienst/ schetz/ vnd güter ver-
fasset/ ist so krefftig/ vnd wircket so gewaltig / das er/
in/ vnd durch dasselbe alles schaffen vnd ausrichtē
kan/ vnd nicht allein den ewigen Tod/ von vns/ der-
massen treiben/ das wir ewig vnd geistlich von im
getreiet

Leichpredigt.

gefreiet vnd entledigt werden / vnd in/wie er saget /
nicht sehen sollen / sondern auch für der bitterkeit
vnd schrecken des zeitlichen Todes also præseruiren
vñ bewaren / das wir auch denselbē nicht sehen noch
etwas empfindlichs von im erfahren oder schme-
cken sollen. Wie solchs mit vielen andern orten der
heiligen Schrift / auch mit exempeln / könnte weiter
dargethan vnd erwiesen werden / wie nemlich from-
me gleubige Christen / mit fried vnd freud dahin fa-
ren / vnd von alles schrecken vnd zagen / mit herzlich-
lust von dieser Welt abscheiden / vñ seliglich in Chri-
sto auff sein Wort einschlassen / vnd zum ewigen le-
ben erhalten werden. Solchs köndte / sage ich / wei-
ter dargethan werden / wenn diese Wort vnser
HERRN Christi nicht so hell vnd klar gnugsam ge-
setzt vnd geredt weren / das sie weiterer erklerung
nicht bedürffen.

Luc. 2.
Phil. 1.
Ioh. 11.

Dieser liebste Son Gottes Christus Jesus /
ist der trewe Arzt / von dem David sagt: Der dir
alle deine Sünd vergibt / vnd heilet alle deine ge-
brechen / der dein leben vom verderben erlöset.

psalm. 103.

Vnd das thut dieser liebste HERR alles
aus Gnaden vñ Barmherzigkeit / wie es David
daselbst herrlich rühmet / vnd spricht / Er krönet
dich mit Gnade vnd Barmherzigkeit / das ist /
von alle vnser zuthun vnd würdigkeit / von alle ver-
gehung / blos aus Gnaden / beweiset dieser getrewe
selige

Leichpredigt.

selige Arkt / solche sein Kunst vnd Hülff an vns /
Vnd thut so gar reichlich vnd oberflüssig / das es
nicht allein mus geholffen vnd geheilet heissen /
Sondern auch gekrönet vnd zum höchsten ge-
ehret.

Ca. 1.

Solch sein kunstreich Meisterstück / solche se-
lige Gnade vnd Barmherzigkeit / hat er / der H^Ere
re Christus / bald an vnsern ersten Eltern im Pa-
radis bewiesen / da er inen das bewerte Pflaster /
sein Heilsames seligmachendes wort / aus gnaden /
ohn alle ire bezalung vnd würdigkeit aufgelegt /
vnd sie von dem grimmigen Todesstachel / damit
sie tödlich verwundet waren / widerumb gefreiet /
vnd gesund vnd lebendig gemacht hat.

Eben das thut vnd beweiset er noch / vnd wil
thun vnd beweisen / an allen Menschen / die solcher
seiner Arzney vnd hülff bedürffen / vnd In sampt
seinem Wort / in warem Glauben suchen vnd bege-
ren / wie er denn in der gantzen Welt leßt ausruf-
fen / vnd menniglichen reichlich anbieten / vnd ver-
kündigen.

Andern Medicis zeucht man nach / vnd lohnet
inen / wie billich / Aber dieser Medicus ist zu vns
armen patienten vnerfodert / vnd vngesucht / vom
Himmel herab / aus seinem Thron vnd Herrligkeit /
in dieses elende Jamerthal kommen / vnd vns / on
alle bezalung vñ in dieser vnser höchsten
noth

Leichpredigt.

noch des Todes besucht/ vnd sich vnser dermassen an-
genommen/ das er auch sein leben für vns gegeben/
auff das wir in im das Leben vnd die seligkeit haben
möchten. Vnd ih̄o besucht er vns noch teglich/
durch das heilige Ministerium/ vnd hilfft vnd heilet
vns noch in seinem wort vnd heiligen Sacramen-
ten/ bis er vns endlich in vnserm sterbstündlein/ das
letzte Band auffleget / vnd gantzlich von allem vbel/
Elend/ vnd Jamer los vnd ledig machet/ vnd zu sich
in sein ewiges Reich zu ewiger Ehr vnd herrligkeit
vorsezt.

Anderer erfarene Medici brauchen in irer Arz-
ney mancherley Kreuter vnd Species/ vnd machen
ex simplicibus composita/ vnd nach abwechselung
der krankheiten vnd Temperamenten brauchen sie
abwechselung der Kreuter vnd anderer Sachen.
Dieser Medicus aber **G**hr̄istus Jesus/ hat nur ein
einigs Simplex / das ist sein heiliges vñ allein selig-
machendes Wort / damit/ welchs wunder ober alle
wunder ist/ vertreibt er alle tödliche krankheiten/
ja auch den ewigen vnd zeitlichen Tod/ mit all seiner
gewalt / bitterkeit vnd schmerzen/ wie er selbst alhie
bezeugt/ So jemand mein Wort wird hal-
ten/ der wird den Tod nicht sehen ewiglich.

Es ist dis wort Christi die rechte einige Wege-
leuchte/ dauon der Königliche Prophet David sa-
get: Dein wort/ **HERR** ist meiner Füße leuchte. Psalm. 119.

G

Es

Leichpredigt.

Ephes. 6.

Rom. 1.

Es ist der rechte Beyrauch / Wehr vnd waffen / allen gestanck / list vnd anlauff des Teufels zuuertreiben / wie Paulus erinnert / Summa / es ist die krafft Gottes selig zu machen alle die daran glauben.

Ist dieses nicht / meine geliebten / fromen Gottesfürchtigen hertzen / welche ire not vnd elend / darinne sie von wegen der Sünden sieckē / mit ernst beherzigen / ober die massen tröselich zu hören / das sie an Christo irem HERN ein solchen trewen Arzt vnd Helffer / vnd an seinem wort ein so gewisse krefftige hülffe vnd Arzney haben / wider den Tod vnd alles unglück? Wer wolte dieses nicht für das höchste Kleinot / vnd für den höchsten tewrsten schatz achten vnd halten? Denn dergleichen trost / hülff vnd rettung / sonst bey keiner Creatur nirgend zu finden noch zu überkommen ist.

Aber darauff müßē wir fürs dritte auch gut acht geben / das solcher trost / hülff vnd selige Arzney / wie sie der allmechtige SON Gottes ganz gnediglich vñ mildiglich darbeut allen Menschen / dennoch nicht jederman on vnterscheid widerferet / denn das verspricht auch der HERR Christus nicht / sondern sagt gar deutlich / das allein die / den tod nicht sehen / das ist / dieser seiner hülff vnd trosts geniessen sollen / So sein wort halten / das ist / die predigt seines Götlichen worts von hertzen lieben / gerne hören / vnd mit warem Glauben annemen / derselben
sich

Leichpredigt.

Sich trösten vnd freuen/vnd nach gehöreten Wort se
leben in Busfertigkeit anstellen vnd richten.

Das ist gewis/Wo Christus mit seinem Wort
ist/vnd gepredigt wird/da ist auch zu mal diese kreff-
tige Artzney/trost vnd selig hülffe wider die Sünd
vnd Tod. Das sie sich aber nicht an allen / die dis
wort hören/ereuget / vnd ire krafft vnd wirkung
nicht sehen lest / ist nicht Christo dem HErrn oder
seinem wort / die schult zuzuschreiben / Sondern
denen allein / die dis sein Wort gering schehen vnd
verachten/nicht mit rechtem gebürenden ernst mei-
nen/noch mit warē Glauben ergreifen vnd halten.

Darumb so ligts nun daran/ das dies:s selige
vnd krefftige wort Christi vns nicht allein gepre-
digt werde / vnd Christus in demselben sein hülff
vnd rettung wider die Sünd vnd Tod/ vns darbie-
te / sondern das wir es auch für gewis vnd war-
hafftig halten/mit festem Glauben/ vnd herzklicher
zuuersicht vnd vertrauen ergreifen / vnd vns ap-
pliciren vnd zueignen / auch vnser leben darnach
halten vnd richten / In summa/ rechtschaffen/ wie
Christus hie sagt/dis sein wort halten. Denn dis
alles wil Christus durch dis wörtlein halten ver-
standen haben / welchs durch gnad vnd wirkung
des heiligen Geists / dauon E. L. zu ander zeit hö-
ren/geschehen kan vnd mus. Als denn können vnd
mögen wir aller erst/wil Christus hie sagen/ solcher

Leichpredigt.

seiner gnediger getrewen Hülff/ in seinem wort/
teilhaftig werden / vnd diese befreitung vom Tod
überkomen vnd haben/durch die wir vom Tode so le-
dig/ frey / vñ los gemacht werden/das wir in weder
hie zeitlich noch dort ewiglich nicht sehen/oder seine
bitterkeit / sein schrecken / macht vnd gewalt nicht
empfinden noch erfahren sollen.

Vnd damit wir ja diesen seinen wortē glauben/vñ
an denselbē im wenigsten nicht zu zweifeln hettē/wil
der HErr Christus in abgelesenem Sprüchlein/sol-
chen trost hülff vnd rettung vns nicht schlechtlichen
allein zusagen vnd anbieten/ Sondern mit einem
duppelten Eid versprechen vñ beteuern. Denn also
spricht er / Warlich Warlich ich sage euch/
Es ist gewis vnd im Werck / vnd in der that al-
so vnd nicht anders: Wer mein wort wird hal-
ten/ der wird den Tod nicht sehen ewiglich/
Vnd das thut er/ vns damit zu reizen vnd zu lockē/
solcher gnad/hülff/ vnd trost desto mehr vnd fleissi-
ger warzunehmen / vnd mit desto mehrer zuversicht
vnd vertrauen dieselbe zusuchen vnd zu gebrau-
chen. Wolnu dem/ bey dem Christus also stad vnd
raum findet.

Der tewre Man Gottes D. Mart. Luth.
schreibt über diese wort an ein ort seiner Bücher al-
so

Psal. 51.

Leichpredigt.

So: Wie vngleublich ist doch das geredt/ vnd wider
offentliche vnd tegliche erfahrung/ dennoch ist's die
warheit/ wenn ein Mensch mit ernst **G H X J E Z**
Wort im hertzen betrachtet/ im gleubt/ vnd darüber
einschleffet / so sincket vnd fehret er dahin/ ehe er
sich des Tods versihet/ vnd ist gewis selig im Wort/
das er also gegleubet vnd betrachtet / dahin gefah-
ren .

So viel auff's kürzest von der einfeltigen er-
klerung dieser tröstlichen wort Christi / daraus wir
lernen/ wie wir elende Erdwürmlein in betrach-
tung vnser elendes vnd jamers wegen des zeitli-
chen vnd ewigen Todes/ aller hülff/ trost/ vnd ret-
tung bey Christo Jesu/ vnserm aller trewestem Hei-
land/ vnd seinem Wort/ zuuersehen vnd zu erholen
haben/ wenn wir vns allein mit rechtem Glauben
vnd ernst zu Christo vnd seinem Wort finden vnd
halten.

Solchs wil vns Gott noch heut zu tag nicht
blos allein verkündigen vnd predigen lassen/ Son-
dern hat vns dessen auch nach seinem Göttlichen
rath vnd wolgefallen / ein lebendig exempel für die
augen gestellet / an diesem vnserm lieben Herrn Su-
perintendenten/ seligen/ welchs ich im zum Christli-
chen zeugnis / vns aber zum exempel vnd fürbilde/

G 3

E. L.

Leichpredigt.

E. L. zum andern Stück dieser predigt
kürzlich darzuthun fürgenommen.

Wolte aber zwar wünschen / das ich diesem
Gottseligen trewen woluerdienten Manne / sein
lob vnd zeugnis dermassen ausführen / vnd wie es
wol billig vnd recht wehre / geben vnd hinderlegen
könte. Denn ich bekenne williglich / das ich viel zu
gering dazu bin / vnd sich meine gaben dahin nicht
erstrecken / Jedoch verhoffe ich / wie im eingang auch
gemeldet / fromme hertzen werden mit mir in die-
sem vnuersehenen fall / vnd grossen betrübniß / gut-
willige gedult haben.

W nu wol dieser vnser vielgeliebter Herr
Superintendens / seliger / nach algemeinem vnserm
zustande / darinne wir Menschen alle von natur
von wegen der Sünden stecken / vnd Er hertzlich an
sich nicht weniger / als an allen Menschen erkand /
vnd beides / bey gesundem leben / vnd in seiner schwa-
cheit / wie wir hernach hören wollen / mit hertzlichen
seufftzen beweinet vnd beklaget / aus diesem zeitli-
chen leben geschieden / vnd für vnsern augen hic tod
liget / Dennoch ist er nicht tod / hat auch den Tod /
nach dem Wort Christi nicht gesehen / vnd ist auch
nicht allein vom ewigen Tode durch vnsern H E
X X N Jesum Christum entlediget vnd gefreiet
worden / das er in ewigkeit nicht sehen wird / son-
dern ist auch im zeitlichen Tode / durch Christum
vnd

vnd sein Wort also erhalten worden/das er desselben bitterkeit vnd schrecken/weder gefület noch empfunden hat.

Dem ob er sich wol die kurze zeit vber/in der er sich des predigens eussern müssen/ vbel befunden/vnd in seiner schwachheit mit todes gedanken vmbgangen / So ist er dennoch nie hart lagerhafft gewesen/auch nie sonderer wehe / on allein mattigkeit gefület vnd empfunden / wie er denn auch noch die stund vor seinē seligen abschied in der Stuben vmbher gangen / das sich niemand seines todes die zeit vber vnd dazumal sonderlich/vorsehen mögen.

Vnd an vorsehienen Montage am Feste Annunciationis Mariæ, zu nacht zwischen 7. vnd 8. vhr/war er lebendig vnd Tod. Denn nach dem er ein weil vmbher gangen/hat er sich darnach nieder gesetzt / vnd zu seinem lieben Weibe also geredt/ Es ist nu auff's letzte komen/ich werde dich gesegnen/bis er sich endlich auff vermanung in sein Betlein selber gesetzt/ da hat er seine Hende ausgebreitet/seine augen empor gerichtet / vnd gesagt/ Nu mein HErr Jesu Christe in deine Hende befehle ich meinen Geist. Vñ als ich zu im komen/vñ in seiner vorigē bekentnis erinnert/antwortet er: Ach das ich künde mit worten darthun vnd ausreden/wie ichs in meinē hertzen hab/wie hertzlich ich mich meines HErrn Christi vñ seines worts frewe vñ tröste/
In

Leichpredigt.

In massen er gleiche Wort kurz zuvor auch gered
hatte / Sprach auch bald darauff mit auffgehobe-
nen gefaltenē Henden: Ach mein HERR Christe bis
nicht lang aussen / kom balde. Vñ hierauff antwor-
tet er gleichsam im selbs: Nu wirds werden / Nicht
also auff sein Betlin / fodert sein liebes Weib zu sich /
vnd lehnet sich an jr / als wolt er etwas mit jr re-
den / Aber sprach abermal / doch schwachlich: Mein
HERR Jesu Christe in deine Hende befehle ich
meinen Geist. Vnd in diesen Worten / schlos er seine
Augen zu / vnd schied in iren Armen eilends vnd vn-
uersehens von dieser Welt / so sanfft / das sich auch
nicht das geringste glied / an seinem ganzen Leibe
bewegt hatte / oder einige gestalt des Todes zu sehen
gewesen were / nicht anders / als were er natürlich
eingeschlaffen.

Das heist ja / meine ich / mein geliebte Christen /
den Tod nicht sehen / nach diesen tröstlichen
worten Christi / so wir iho vnderhanden haben /
wenn man also on einiges zagen vnd schrecken / on
alle furcht vnd eckel / mit so hertzlicher lust vnd seh-
nen / so sanfft vnd seliglich in Christo auff sein wort
einschlefft / Wer wolt sich hierüber nicht frewē / Gott
von herten dafür dancken / vnd sich nach solchem se-
ligen abschied von herten sehnen?

Was sol man doch aber dauon sagen / das sich
der mehrer theil der Welt für dem Tode so peinlich
vnd

Leichpredigt.

und ernstiglich fürchtet und entsetzet / und auch al
zu hefftig der iren abgang sich betrüben und bekü-
mern lest? Solten wir vns nicht viel mehr wissen zu
frewen und zu trösten / weñ wir Elende menschen in
vnsrer höchsten noth und jammer / dannoch sehen / hö-
ren und erfahren / wie wir / und die vnsern / so sanfft
und seliglich / auff G. H. X. I. I. wort und verheiß-
ung / aus dieser Elenden und argen schynöden Welt /
in ein viel bessers / Himlisches / und ewiges leben / zu
Gott der heiligen dreysaltigkeit abscheiden können?
Wie dem dieses an vnserm Pfarherrn und Super-
intendenten (seligen) vns / die wir solchs angesehen /
und sonderlich seinem lieben Weibe / und hinderlas-
senen Kindern / in fegenswertigen irem leid und be-
trübten sehnen nach irem hertzliebsten Herrn und
Vatern / höchster trost ist / das Christus dis sein
Wort und zusag warhafftig an ime erfüllet / und
ins Werck gerichtet / vñ in den Tod nicht sehen /
sondern so sanfft und seliglich einschlafen lassen.
Derhalben sie in auch nicht verloren / sondern
allein in seliger ruhe und friede bey Christo irem
H. E. X. X. I. wissen und haben.

Das aber jemand hie möchte Einrede thun / und
sagen / Ja es gehet nicht mit allen so sanfft vñ leicht
zu im sterben / mancher der auch trewlich und feste
ob Christi wort gehalten / und sich desselben von
herzen gefrewet und getröstet / nimpt nichts desto
weniger

Leichpredigt.

weniger ein schweren Tod/wo bleiben denn die wort
Christi/So jemand mein Wort wird hal-
ten/der wird den Tod nicht sehē ewiglich?
Hierauff geben wir diesen bericht / Es scheint für
vnsern augen gar heßlich vnd abscheulich / das
echliche vhrplötzlich in die hinfallende Seuche/ S-
macht/ vnd dergleichen gerathen / da dachte jeder-
man / sie müsten auch innerlich grosse Pein/
Qual/ vnd beschwerung leiden / Aber durch Got-
tes wunderbarliche schickung ist es in men so gelin-
dert/das wenn sie etwan auffgerüttelt vnd ermun-
tert werden/selbst sagen/Ach/warumb liesset ir mich
nicht ligen/ war mir doch so wol/ ich meinte / ich
wehr schon im Himmel. In diesen bilden kan man et-
licher massen abnemen/ wie der **HEXX** Christus
die eusserlichen vnd innerlichen Schmerken seiner
glaubigen/ in im selbst stillen vnd lindern könne/ das
ob wol dem eusserlichen ansehen nach/ eine Angst
scheinet/dennoch dieselbige also gemindert vnd ge-
lindert werde/das man durchaus sagen vnd bekenn-
nen mus/ Christus ist in seinen worten warhafftig.

Warumb hat aber Gott vnd Christus an diesem
vnsern liebe Pfarhern (seligē)dis sein wort so herr-
lich bewiesen vñ dargethā/das er in den Tod nicht
sehen lassen? darumb / das er Christi Wort
gehalten/ Dasselbe nicht allein für sich selbst im
waren Glauben geliebet / teur vnd wert geachtet/

Leichpredigt.

sondern auch mit grossem Ernst und Eiffer / viel
 Jar / in der heiligen Christenheit / in Kirchen und
 Schulen / mit unableslicher trew und stetem fleis /
 fruchtbarlich geleret und ausgebreitet.

Denn er hat / seliger und Christlicher gedechtnis / von Gott dem allmechtigen / fromme und Gott-
 fürchtige Eltern bekommen / die in von Jugend auff /
 zur furcht Gottes und seinem wahren seligen er-
 kenntnis aufserzogen / vñ in guten Künsten trewlich
 haben unterweisen lassen. Denn sein lieber Vater
 (seliger) Herr Nicolaus Jagenteuffel hat auch zu
 Königsberg in Preussen in der alten Stad der
 Kirchen Gottes / am wort / trewlich und mit grossem
 lob gedienet / und der erste in der selben Kirchen / die
 newe offenbarte warheit des Euangelij angenomē /
 und öffentlich gelert vñ gepredigt / wie in seinē Bild
 vñ zeugnis / so in in der selben Kirchen auffgerichtet /
 zuersehen / in der er auch / sampt seinem lieben Weibe
 Christlich ist begraben worden.

So hat auch dieser vnser lieber Pfarherr (seliger)
 zu Wittenberg in der recht seligen vñ güldenē zeit /
 den tewrn und werden Gottes Man / Doct. Mart.
 Luth. gesehen / und neben andern gelerten Leutē / ein-
 zeitlang gehört / und sonder zweifel / den grund seines
 Glaubens und bekenntnis damals gelegt / Bis er im
 anfang des Jars Christi 1550. sich nach Gottes
 rath und willen / mit seiner hinderlassenen Witwen
 in den heiligen Ehestand begeben / vñ in demselben

Leichpredigt.

Jar in sein Vaterland/zum Professor der Vniuersitet Königsberg in Preussen beruffen vnd bestellt worden/daselbst ist er bis ins 19 Jar geblieben/ vnd ist mitler zeit drey mal derselben Vniuersitet Rector erwelet worden. Vnd auff anordnung des Durchleuchtigsten Hochgebornen Fürsten vnd Herrn/ Herrn Albrechten Marggraffen zu Brandenburg/ etc. Herzogen in Preussen/hochlöblicher seliger gedechtnis/ als Stiffers vnd Fundatoris derselben Schulen/sind bey seinem mitlern Rectorat, gedachter Vniuersitet Königlich priuilegia, in J. F. G. gegenwart/vnd grosser herrlicher versammlung im Thumb daselbst mit aller solennitet promulgirt vnd publiciret worden / Anno nach Christi vnsers HERREN geburt 1561 den 30 Septembris. Das Jar zuvor 1560 ist er daselbst zum heiligen Predigamt von J. F. G. beruffen/ vnd ferner im Lebenicht ordinirt vnd inuestiret worden/ Dazu J. F. G. selbst eigner Person/beim Altar/ sampt dem Rath derselbe Stad/erschienen. Da hat er 7 Jar der Kirchen Gottes neben der Schulé treulich gedienet/ bis in Gott nach sonderlichem seinem Rath vñ wunderlicher schickung von dannen/heraus in diese Lande gefoddert/vñ auff S. Annaberg/zum Pfarherrn vnd Superintendenten verordnet / dahin er von dem Durchleuchtigsten Hochgebornen Fürsten vnd Herrn/Herrn Augusto, Her.

Leichpredigt.

Hertzogen zu Sachsen/ des heiligen Römischen Reichs Erzmarschallen vnd Churfürsten etc. vnserm gnedigsten Herrn / zu ende des 1567 Jars bestellet vnd geschickt kommen. Des orts er auch 7 Jar gewesen / bis J. Churf. S. in gegen Meissen zum Superintendenten vnd des Consistorii dafelbst damals Assessoren / Anno 1574 / beruffen vñ bestellet / vnd ime daneben die General Visitation demselben Consistorio einuerleibter Kirchen / neben J. Churf. S. hierzu deputirten Rechen vertrauet vnd befohlen. Vnd endlich auch nach 7 Jaren / Anno Christi 1581 auff Pfingsté / als für 2 Jaren / ist er auff gnedigste verordnung höchstgedachtes Churfürsten zu Sachsen / vnseres Gnedigsten Herrn / in wehrender J. Churf. S. dieser Lande vormundschaft hieher zu vns gegen Weymar beruffen / vnd zum General Superattendenten bestetigt worden.

Das haben wir von seinem cursu studiorum vnd ministerii auch kürzlich berühren wollen.

Seine lehr betreffend / können wir / seine beide Diaconi vnd Collegæ / für Gott / vñ aller Welt / mit bestand vnd warheit zeugen / das er in derselben richtig vnd rein gewesen / Denn er hat sie gefüret nach der bewerten Richtschnur der heiligen Propheten vnd Aposteln / auch nach dem heiligen Catechismo vnd andern schriften Lutheri / die er von Herzen geliebet / gelobet / vnd vns offtermals commendiret.

Leichpredigt.

Er hat aber nicht allein das rechte vnd gute gepredigt / sondern auch das Böse vnd vnrechte ernstlich gestrafft / sonderlich hat er einen rechten ernstlichen Euffer gehabt wider die lesterlichen Caluinsten / die er öffentlich in seinen predigten / vnd auch in familiaribus colloquiis / so offte im gelegenheit für gestossen / gründlich nach Gottes Wort widerleget / vnd seine im befohlene Kirchen / mit aller treu / fleis vnd ernst / für irem giffte vnd Schwarm verwarnt / in massen er in andern irrigen stücken / damit die heilsame Lehr des heiligen Euangelij von den feinden der Wahrheit angefochten wird / auch gethan / wie ime dessen / so im gehöret / oder sonst mit im vmbgangen / zeugnis geben werden.

Vnd ich für mein Person / hab mich dessen offtermals gefreuet / vnd Gott gedancket / das er diese Kirche / mit einem solchen Gottseligen Eufferigen vnd trewen Manne / aus gnaden / versorget vnd bedacht / hab auch darneben Gott in meinem Gebet trewlich angeruffen / er wolte vns ja den Man lange zeit lassen / wie sonder zweifel viel Gottseliger Herzen auch werden gethan haben.

Heut acht tage nach verrichter Beicht / als wir beide Diaconi im besuchten / bat er vns nach gehaltenem gesprech / wir wolten auff den folgenden morgen beide wider zu im kommen / denn er mit vns zu reden.

Ms

Leichpredigt.

Als wir nun zur ermenten zeit zu ihm kamen/be-
 dancket er sich anfänglich / das wir zu besuch / vnd
 sieng dar auff als bald mit grossen ernst vnd betwe-
 gung an: Lieben Herrn Collegæ / ir sehet das sich
 meine Schwachheit teglich vormehret / vñ zunimpt /
 drum were es wol billig / das / der ich ist mit todes
 vñ sterbens gedanckē vmbgehe / euch als meinē Col-
 gis, die wir zwar ein kurze zeit bey einander gewe-
 sen / mein ganz curriculū erzehlete / vnd mein confes-
 sion thete. Aber es kan hustens vnd mattigkeit
 halben nicht geschehen / Kurz aber dauon zu reden /
 Bekenne ich für vnserm HERN Gott / vnd dancke
 im von grund meines Hertzens dafür / das er mich
 in den ganz gefehrlichen leufften / in die ich / nach sei-
 nem willen hin geworffen worden / bey seinem heili-
 gen / reinen vnuerselchtem wort vnd bekentnis / bis
 auff diese stunde erhalten / mir auch / on rhum / ehrli-
 che dienste / vnd viel / in seiner Werden Kirchen ver-
 trawet / hoffe auch / ich hab aus dem vormügen / so er
 dargereicht / trewlich gedienet.

Da thet er seine Christliche Beicht in vnser bei-
 der gegenwart / mit solcher hertzlicher andacht vnd
 heissen trenen / das wir vns darob verwunderten.
 Sagte auch / er hoffte vñ glaubte festiglich / sein lieb-
 ster HERR vnd Heiland Jesus Christus / würde in /
 als ein armes krafftloses schefflein / auff seine mech-
 tige schultern fassen / vñ zu seiner zeit / ins ewige leben
 tra-

Leichpredigt.

tragen/ Inmassen er sich auch erbot/ wenn in vnser
lieber Gott sein leben fristen würde/ so wolte er in
diese Schwachheit die zeit seiner Tage ein denck-
mal lassen sein. Empfienng auch darauff die Abso-
lution, vnd das heilige hochwirdige Sacrament/
des waren Leibs vnd Bluts vnser HERRN
Jesu Christi/ inmassen er kaum 3 wochen zuvor
auch gethan/ Vnd danckte seinem HERRN Christo
herzlich dafür / das er in mit seinem waren Leib
vnd Blut gespeiset vnd getrencket/ Sagte auch/
weil ich die Himlische speis vnd tranck/meines lieb-
sten HERRN Christi waren Leib vnd Blut/ empfan-
gen / so befinde ich auch augenscheinlich / das sich
Leibstercke vnd linderung meiner Schwachheit er-
euget.

Vnd am nechste Montage am tag Annunciatio-
nis Mariæ, an dem er / wie gemeldet / zu abend selig/
vorschieden/ als sein Son/so also einheimisch/zu frue
aus der Kirchen komē/ hat er in lassen das Euange-
lium vom selben Fest lesen/ darauff angefangen: Lie-
ber Gott/ wie ist doch heut ein hohes/ tewres/ wer-
des Fest. Vnd mit vielen worten/ den tag wegen der
vielfeltigen wunder/ so an demselben solle geschehen
sein / vnd fürnemlich / die fröliche Gnadenreiche
Menschwerdung vnser HERRN Christi gerhümet.
Vnd darauff gefragt/ Ob man auch das Hæc est
dies in der Kirchen gesungen? Vnd hat diesen Se-
quentz

Leichpredigt.

quentz / den er sonst die zeit seines lebens hoch gehalten / vnd oft gesungen / folgendts mit herzlicher freude gesungen / vñ nach widerholtem vers / Hodie Deus homo factus est, Heut ist Gott Mensch worden / ist er für freuden auffgestanden / vnd gesagt / Was wollen wir mehr / Gott ist Mensch worden.

D Jhesus melde ich darumb ausführlich / das E. L. draus können abnemen / das sein Lehr / Glauben / vnd bekentnis richtig gewesen / wie er sich denn auch im ersten antritt seines ampts in vnser Kirchen dieses fals also erkleret / vnd sich sonsten gegen die Bekenner vnd Liebhaber der reinen vnuerfälschten warheit Göttlichs worts dermassen erzeigt vnd verhalten / das menniglich hohes vnd nidrigs standes / billich nicht allein wol mit ime zu frieden gewesen / sondern auch ein gefallen darob getragen.

ER verlest seiner gaben geschickligkeit vnd ernsts fleisses / ein herzliches vnd sehnliches verlangen hinder sich / bey jederman / fürnemlich aber vnd besonders bey vnser lieben hohen Obrigkeit / bey vns seinen Collegis, vnd andern Pastoribus.

Was sein Leben anlanget / hat er alle tugend eines rechten trewen Bischoffes / wie sie Paulus erfordert / an sich gehabt / in nüchternkeit vnd messigkeit gelebet / Ist friedfertig vnd fiesam gewesen / Hat einen ernst vnd auch eine freundligkeit gegen jederman wissen zu gebrauchen / Mit seiner lieben
E Haus.

Leichpredigt.

Hausehren / seiner hinterlassenen Wittwen / hat er
einen friedlichen Ehestand in rechter lieb vnd einig-
keit bejessen. Auch die seinen / sonderlich seine liebe
kinder / die Gott lob fast erzogen / zur Gottesfurcht /
Tugend / zucht vnd erbarkeit angehalten / vnd treu-
lich vermanet vñ gezogen / Damit er auch selbst sein
liebes Weib / die stund vor seinem seligen abschied
getröstet. Denn als sie in ires betrübten Wittwen-
standes vnd irer lieben Kinder erinnert / hat er ir ge-
antwortet / Lieber / lebt nicht Gott noch? Vnd / wir
haben sie erzogen / das sie Gott kennen / was wollen
sie mehr? Wie er denn albereit einen Son im heili-
gen Ministerio zu Wittenberg hat / in massen zwee-
ne Söhne daselbst studieren.

Es ist nu in der ruhe / Gott helffe vns mit
gnaden zu seiner zeit auch hernach / Amen.
So viel vom andern Stück.

Ist noch vbrig

Das dritte vnd letzte.

Was haben wir denn fürnemlich zu bedencen
bey dieses seligen Mannes vhrplötzlichen
abschied? Erstlich sollen wir was zu gemüt führen / den
Spruch Pauli / welchen er mit diesen Worten sehet
Wir wollen euch liebe Brüder nicht vorhalten / vor

2. Thes. 4.

De

Leichpredigt.

denen die da schlaffen / auff das jr nicht trawrig seid
wie die andern / die keine hoffnung haben. Denn so
wir glauben / das Jesus Christus gestorben / vnd
auferstanden ist / also wird Gott auch / die da einge-
schlaffen sind durch Jesum / mit im führen.

Es thut freilich einer frommen Hausmutter
wehe / ein stück von irem herzen zuuerlieren: Es thut
vns im Ministerio billich wehe / das wir eines sol-
chen trewen Collegæ müssen entraten. Ir zuhörer
bekümmert euch billich vmb ewern lieben trewen
Pfarherrn / den jr so kurze zeit gehabt. Jedoch sollen
wir allesamt wissen / vnd vns des trösten / wir ha-
ben in nicht verloren sondern allein für vns hinge-
schickt / in das rechte ewige Vaterland. Denn wir
sind hie nicht daheim / vnser wandel ist droben im
Himmel / von dannen wir auch wartē des Heilandes
Jesu Christi / des HERRN / welcher vnsern nichtigen
leib verfleren wird / das er ehnlich werde seinem
verflerten Leibe / nach der Wirkung / da er mit auch
kan alle ding in vnterthenig machen.

Darnach sol dieser vnuersehne todesfall Gott-
fürchtigen Christen eine erinnerung sein / das vnser
lieber HERR Gott / gewis etwas sonderlichs vnd
grosses fürhabe. weil er diese enderung also fürge-
nommen / vnd diesen eyuerigen Man / da man seiner
trewen eyuerigen dienst am aller meisten benötigt /
von vns abgefodert / vnd zu sich hinweg genommen.

Leichpredigt.

Esa. 56.

Lasset uns nur nicht/ geliebte Christen/ mit der
 sichern rohen Welt geringschetzig hindansehen/ vnd
 verachten. Denn es Gott selbst gar ernstlich durch
 den Propheten Esaiam straffet/ im 56 Cap. da er
 auch zumal weist/ wie er gerechte heilige Leute/
 trewe Lerer vnd Prediger/ vnd die/ so richtig in die-
 ser Welt für sich gewandelt haben/ nicht ohn ge-
 fahr/ oder ohn sonderlichen seinen Götlichen rath
 vnd willen/ lasse umbkommen vnd sterben/ sondern
 hab allezeit daneben vnd vnter des was sonders
 vnd grosses für/ dar auff von menniglich gut acht zu
 geben. Denn so spricht Gott durch den Prophe-
 ten: Der gerechte kömpt vmb/ vnd niemand ist/ der
 es zu Herzen neme/ vnd heilige Leute werden auff-
 gerasset/ vnd niemand achtet dar auff. Denn die
 Gerechten werden weggerasset/ für dem vnglück/
 vnd die richtig für sich gewandelt haben/ kommen
 zum friede/ vnd rugen in iren Kammern. Inen/ wil
 der heilige Prophet/ ja Gott selbst durch den Pro-
 pheten sagen/ geschiet wol/ denn sie entgehen vielem
 vnglück/ vnd komen zu friede vnd ruhe/ ja Gott ei-
 let mit inen zur ruhe. (saget das Buch der Weisheit
 im 4. cap.) aus diesem bösen Leben/ darumb das
 ire Seele Gott wolgefellet. Aber die Leute/ so es se-
 hen/ mögens wol zu Herzen nemen/ vnd drauff
 achten/ vñ dar auff bedacht sein/ das auch sie durch
 ware Reu vnd Busse/ im warē Glauben zu Gott
 sich

Sap. 4.

Leichpredigt.

sich finden vnd halten / damit sie gleicher gestalt/
derselben vnd dergleiche gefahr / vnglück vnd straf-
fen / derer das Buch der Weisheit im gemelten capi-
tel viel nach einander erzelet/entgehen / durch Gott
erhalten/ vnd zu seinem ewigen Reich/ friede / vnd
ruhe bewahret werden mögen.

Itzo ist's vngesefhrlich 24 Jar/das der fromme
vnd Gottselige Man/Herr Iohan. Graw/der erste
Superintendens zu Weymar mit Tode abgangen/
Was seid der zeit für viel vnd mancherley erberm-
liche verenderung in diesen Landen vnd löblichen
Fürstenthumb fürgelauffen / ist fromen Christen /
leider besser bekant vnd bewusst/denn es noch were
zuerzehlen. Was nun auff dieses Superintenden-
ten/welcher der ander ist/der alhie sein leben geendet
vnd beschlossen/erfolgen werde / das weis Gott al-
lein. Zu besorgen ist's / es werde unsere höchste not-
durfft sein/das wir fleissig beten/ vnd durch ware
Busse vnd bekerung dem zorn Gottes / vnd seinem
Gericht in der zeit fürbeugen.

Endlich sollen Gottlose / freche Leute/ sonder-
lich auch die Klügling/denen kein Prediger fast gut
sat ist/ vnd an einem dis/ ant. andern ein anders zu
taddeln haben/gefellet inen dieser nicht so lauffen sie
zu dem andern/vnd aber zu ein andern/vnd lernen
doch von einem so viel als vom andern/wie Paulus

2. Tim. 3.

vō den Leuten in den letzte tagen weissagt / Sie ler-
nen

Leichpredigt.

nen inmerdar/vñ können nimmer zur erkenntnis der
 Wahrheit komen/diese/ sage ich/ sollen hier bey beden-
 cken/vñ inen wol einbilden/das es hohe zeit sein wil/
 das sie sich zu Gott bekeren/bey zeit Busse thun/vñ
 sich ernster vnd fleissiger / zu seinem heiligen wort/
 vnd gebrauch des Sacraments des Altars finden
 vnd halten. Denn thut das Gott an den seinē/vnd
 am grünen holtz/das er so vhrplötzlich vnd vnuerse-
 hens/fromme nützliche Leute/ trewe reine Prediger
 abfodert/was wil am dürrē holtz geschehen/ das ist/
 an denen/die mutwillig in allerley Sünden/schan-
 den vnd lastern fortfahren/ falscher Lehr beypflich-
 ten/ die predigt des Göttlichen worts / vnd den
 brauch der heiligen Sacramenten verachten/ die
 Kirch betrüben/ allerley vnruhe vñ vnordnung an-
 richten/vnd nur auff gute lufft vñ gelegenheit/ iren
 mutwillen vnd schwermeren fortzusetzen/ lauren
 vnd warten? Warlich die werden Gottes gericht/
 seinem zorn vñ vielfeltigen drawungen gewis nicht
 entlauffen/ wie sicher sie auch immer sein mögen/
 das sie Gott nicht der mal eins plötzlich vnd vn-
 uersehens oberfalle vnd stürze. Es ist aber hie nicht
 vmb Leib vnd leben allein zu thun/ das sie Gott hie
 zeitlich allein straffe/ denn das were ein geringes/
 sondern es trifft Seelen seligkeit an/ewiges verder-
 ben vnd Tod / das nimmermehr vnd in ewigkeit
 nicht zuerwinden ist. Darumb sie ja billich

Leichpredig l.

In sich selbst schlagen solten/ vnd das schwere gericht
vnd vrtail Gottes/ das men auff irem hals ligt/ vnd
dafür sie Gott dannoch gnedigst in seinem Wort/
durch seine diener/ verwarnen/ vnd zur Busse ver-
manen lest/ endlich einmahl erkennen/ sich bessern/ vñ
Gott treulich im waren Glauben an Christum
anruffen vnd bitten/ so würde er sie laut seines worts
zu gnaden annemen/ men ire Sünde vergeben/
vnd sie endlich zu sich in sein ewiges reich/ sampt an-
dern Auserweleten/ versetzen.

Dies sind also kürzlich die drey Stücke/ welche
wir zu diesem mal zuhandeln für vns genomen.
Das erste ist gewesen/ von der erklerung des abgele-
senen Trostsprüchleins des **HE R X N** Christi/
Warlich/ warlich/ ich sage euch/ so jemand
etc. Das ander/ von dem gezeugnis vielgedach-
tes vnsers Herrn Superintendenten (seligen) vnd
wie Christus dis sein wort an im reichlich erfüllet
vnd ins werck gerichtet. Das dritte/ von dem / was
wir fürnemlich allerseits bey diesem todesfall be-
dencken vnd betrachten sollen.

Der getreue Gott beschere vns auch / zu
seiner zeit/ ein solchen seligen abschied/ vnd end-
lich/ sampt allen Auserweleten/ eine fröliche
auff

Zc 98

Leichpredige.


aufferstehung vmb Christi seines lieben Sons vn-
sers **HERREN** willen / welchem sampt Gott sei-
nem Himlischen Vater vnd dem heiligen Geist / sey
lob / ehr vnd danck gesagt / von nu an bis in alle
ewigkeit / Amen / Amen / Amen.

Apoc. 14.

ICH hörete eine stimme vom Himmel
zu mir sagen / Schreibe / selig sind die tod-
ten / die in dem **HERREN** sterben / von nu
an. Ja der Geist spricht / das sie rügen
von irer arbeit / denn ire Werck folgen inen
nach.



M. 15



Der Erbar⁷ vnd

Zugentsamen Frauen Walpurg / des
Ehrwürdigen / Aelchbarn vnd Hochgelarten Herrn /
Magistri Nicolai lagenteufels, weiland Pfarherrn
vnd General Superintendenten zu Weymar / seli-
gen / nachgelassenen Wittwen / meiner gün-
stigen vnd besonder guten
Freundin

Gottes Gnad vnd Barmherzigkeit / durch vnsern
getrewen Herrn vnd Heiland Jesum Christum / mit reichem
trost vnd stercke im heiligen Geiste / sampt erbietung mei-
nes glaubigen Gebets / vnd ganzwilliger Christ-
licher dienste / jeder zeit zuuor.



Abare / Zugentsame Frau Su-
perintendentin, auch geliebte Freundin /
Gott der heilige Geist im 4. Cap. des
Buchs der Weisheit sagt mit gar schö-
nen ernstten Worten : Der Gerechte / ob
er gleich zu zeitlich stirbet / ist er doch in
der ruhe etc. Denn er gefelt Gott wol / vnd ist im lieb / vnd
wird weggenommen aus dem Leben vnter den Sündern /
vnd wird hingerückt / das die Bosheit seinen verstand nicht
verkere / noch falsche Lere seine Seele betriege. Den die bösen
Exempel verführet vnd verderben eim das gute / vnd die rei-
hende lust verkeret vnschuldige Herzen. Er ist bald volkomen
worden / vnd gar viel Jar erfüllet / denn seine Seele gefelt
A ij. Gott